

Conforme artículo 1203 di Código Civil Banesco International ta pidi venta na vindishi di Hilton Hotel

ORANJESTAD - Atrobe mundo turístico y economía nacional di Aruba a wordo sacudí pa un otro fracaso of mas bien desastre financiero di Hilton Hotel (alias Concorde Hotel, cual den su dianan di gloria tabata e hotel mas grandi y atractivo na Aruba unda turistanan Venezolano cu nan Bolivar fuerte tabata invadí tur weekend e sitio unda wega di placa y shownan bunita tabata e recreacion di weekend).

Ayer mainta a sali sorpresivamente, algun fuente sin embargo tabata na altura caba, e noticia cu Hilton Hotel lo wordo bendí na vindishi entrante dia 10 di Mei venidero. Bon Dia Aruba a tuma varios biaha contacto cu e manager di e hotel pero en vano. Remarcabel ta cu e

manager anterior a keda pa un corto tempo. E personal di Hilton no ta na altura cu un venta na vindishi tabata dilanti porta. No tabatin ningun rumores of desarroyonan alarmante den senonan di Corte y abogacía. Un peticion pa un 'faillissement', surséance van betalings, faillissement definitivo y despues venta na vindishi, nada di esaki. Kiko a pasa anto cu Hilton Hotel?

Durante e caída di Concorde Hotel, diferente desarroyo yen di obscuridad financiero tabata tópico di dia. Na varios ocasion publicacionnan a sali den corant riba e posicion financiero hopi debil di Concorde. Solucionnan a wordo buscá den exterior. E rol di e doñonan Venezolano den e asunto di continuacion di e operacion y venta di e hotel tabata grandi. Hilton a

bira e candidato pa compra Concorde. E mundo turístico di Aruba a cumenzá hala rosea atrobe. Bao pueblo a keda reina e incertidumbre riba e forma con e venta y compra aki a tuma lugar.

Na momento cu Concorde a wordo bendí e tabatin un debe grandi ainda na un companía, dunadó di hipoteca na Concorde pa un suma di alrededor di 15 miyon dollar. E debe aki di Concorde a wordo tumá over pa Banesco International di Puerto Rico. E último companía aki t'esun tambe cu a duna Hilton Hotel un promé hipoteca di 19 miyon Dollar. (No ta conocí cu den e 19 miyon dollar aki ta incluí e 15 miyon dollar cu a wordo tumá over). En todo caso Hilton Hotel siguiyemente a haña un di dos hipoteca pa un suma di 26 miyon Dollar di Growth Overseas Development Corporation (Grodco). Un di tres hipoteca na razon di 6 miyon Dollar a sera e rij por lo pronto.

Hilton Hotel ta wordo bendí a base di artículo 1203 di nos Código Civil. Esaki ta encera cu e promé dunadó di hipoteca, Banesco International, a stipulá conforme e artículo mencioná cu:

si Hilton no cumpli cu su obligacionnan pa loke ta pago di e suma principal y intereses di esaki e lo keda exclu-


sivamente autorizá pa vende e Hotel na vindishi pa saca e placa cu Hilton debé. E cláusula aki ta registrá den e registranon hipotecario cu ta administrá y registrá datonan relacioná cu hipoteca.

Aki nos ta mira e pakiko tur cos a presentá su mes asina liher sin cu a bai algun

señal adelantá anunciando e caída financiero di Hilton. Doñonan di Hilton ta "grupá" den un companía cu yama Aruba Hotel Enterprises y ta encera un cantidad (mas o menos cinco) di director precedente di Venezuela. Algun tempo pasá un grupo chikito a sali for di Aruba Hotel Enterprises y a forma un companía cu ta interesá den compra di BETA hotel.

E pregunta grandi ta keda awor con bon, sincero y eficiente e hotel aki a wordo manehá. E construccionnan di financiamiento a tuma lugar den un esfera hopi será. Ki influencianan grandi negativo for di exterior por a perhudicá funcionamiento y management di e hotel? E bancarota di Banco Latino - manera a wordo comentá den corant - por a acelerá e caída financiero aki? Of cosnan ta bayendo di hopi tempo caba malo?

Preguntanan hopi pa contestá. Lo mas interesante ta pa sa pa cual suma mínimo e venta lo bai na vindishi. QESM



Integranenan di e grupo di natacion sincronizá Baracuda kendenan a participá na un torneo di 'waterballet' na Corsow.